

ORBIS TERRAE TYPVS.



VM ex naturæ necessitate ordo semper requirat generalia particularibus antepondere, totumque parti, ad maiorem oblatę rei intelligentiam: hac eadem & ego divinctus lege huic primo nostrę Geographiæ ac Septentrionalium terrarum tomo, universalem Orbis terrarum typum, ejusque quatuor partes, Europam, Africam, Asiam & Americam, quò scilicet rem prosequar, præponere debui: & singulis quoque deinceps tomis consequentibus, ut is etiam perfectum semper habeat opus, ac totius universi descriptionem, nec hac utili speculatione privetur, qui vel suę tantum patrię delineationem sibi comparaverit. Iucunda etenim est & maximopere necessaria generalium contemplatio, ei qui vel minimam Mundi & naturalium rerum cognitionem habere cupit. Si enim libeat considerare, quis Solis ortus vel occasus, quę causa æstatis vel hyemis, unde inæqualitas dierum & noctium existat: quid denique & quo in loco natum, propagatum, actum, gestum, mutatum & conuersum jam inde à rerum conditarum primordio fuerit, id omne certe non aliunde melius, quàm ex harum quinque tabularum adjunctione sine omni periculo & honestā cum animi voluptate didiceris. Et quemadmodum nulli, quantumvis amplam habitationē nactus, sufficit perspectas habere suarum ædium partes, ut sunt atrium, cella vinaria & penaria, culina, triclinium, cænaculum, cubiculum, conclaye, musæum, quò iis commodè uti possit; sed etiam in quā urbis parte & plateā, domus eius sita sit, compertum ipsi esse necessarium & commodum est, ut hinc cognoscat statim, si in civitate tumultus vel incendium oriatur, quàm propè vel procul à periculo absit. Sic non minùs jucundum vel necessarium nosse, quā in Orbis parte habites, quos populos vicinos, aut remotiores habeas, ut grassantib⁹ belli calamitatibus, quo metu, quāve animi tranquillitate uti liceat, scire queas. Denique cū Cosmographia sit lumē totius tam ecclesiasticę quàm politicę historię, & plūs ex eā discat otiosus spectator, quàm ex longo, molesto & sumptuoso labore peregrinator, qui crebrò cælū tantū, nō autem animum mutat: parum utilitatis ex eā capias, si tabulis particularibus generales non adjunxeris. Sunt autem hæ generales Tabulę collectę ex magnā Orbis terrę descriptione (cuius etiam initium longitudinis, vel primi meridiani positionem in singulis sequuti sumus) & ex magnā Europā meā quas Duysburgi edidi. Tu interim Lector vale & fruire, ac hujus tuę habitationis ac tibi ad tempus tantum cōcessę gloriam cum Poëta Buchanano diligenter considera, qui sic eam cœlestibus comparat, ut animos terrestribus ac rebus hisce caducis immerfos extrahat, & ad altiora ac æterna viam ostendat:

Percipias